



宛陵先生文集目錄卷第三十五

和吳興五題

和行之芭蕉

促織

吳仲庶邀和六篇

和荅宣城張主簿

送寺丞

辨疑贈嚴甫

盜儒

宣城郭宰遺林檎

自和

送王奉職之彭澤

寄潘歙州伯恭

再寄潘歙州

和永叔荅原甫

依韻酬永叔

依韻酬永叔再示

池州蕭相樓

雜興

夢後寄永林

送王著作赴壽安

次谷了素上人

送黃通判入浙

烏啄棗

真上人因送傷足

和酬潘歙州

潘歙寄紙并硯

始見白髭

送了素游廬山

目錄終

宛陵先生文集卷第三十五

依韻和正仲賦楊兵部吳興五題



雨過見虹明長橋欲映城
惚間晴氣入空際
晝涼生有扇徒看畫無冰
自覺清人知太守姓不減漢
公名

清風樓

在昔有佳句故人如遠來
競生吳客柁不上楚王
臺稍拂清樽動時吹翠帟
開長安在何處水鳥望
中迴

明月樓

卷三十五
一
雪霽前溪白蒼蒼後嶺巍人疑槎上客星合蚌中
暉影轉闌干迥盃行漏鼓稀只知誇粉黛不向桂
邊歸

碧瀾堂

虛雲臨滉漾橋勢對隆穹環珮佳人去汀洲翠帶
空橋舫過砌下蘭棟起雲中欲問芳菲地吳王一
廢宮

逍遙堂

江東有賢守好客似春申自構杏梁地不生珠履
塵樂章思季子後俊得吳均寢卧在其下知君學

至人

依韻和行之都官芭蕉詩

看取有心常不展亦知隨分圻佳葩無端大葉映
蓮幕却笑菖蒲罕見花

促織

札札草間鳴促促機上聲織女夜中起明河簷外
橫一絲不入杼踈密工未精豈知天孫巧衣脫六
銖輕人間唯貴重暗蟲休催成

吳仲庶殿院寄示與呂冲之馬仲涂唱和詩
六篇邀予次韻焉

次韻被命出城共汎

三驄忽出乘楚艘直氣突兀如吳濤大都智勇皆
世豪橫身破浪親戰舳迴舫受箭誰畏曹猛士心
伏寒生毛風聲鶴唳傳九臯何用寶刀稱孟勞右
持酒盃左持螯功成各慕前人高不言大享烹太
牢下與尺鷃翔於蒿

依韻游陳留禪寺後池

共逢香刹住萬景筆頭堆池水蛟龍盡汀洲鴈鵠
來遠游情莫落去國意徘徊舟子休敲鼓王程不
爾催

次韻晚泊睢陽

日下繡衣客江南燕尾艍跡雖同鷁退心不假犀
涼舊國旌旄去包原苑囿荒臨堤一懷古柳上見
微陽

汴渠

我實山野人不識經濟宜聞歌汴渠勞謾綴汴渠
詩汴水源本清隨分黃河枝濁流方已盛清派不
可推天王居大梁龍舉雲必隨設無通舟航百貨
當陸馳人肩牛騾驢定應無完皮苟欲東南蘇要
省聚斂爲兵衛詎能削乃須雄京師今來雖太平

盡罷未是時願循祖宗規勿益群息之譬竭兩川
賦豈由此水施縱有三峽下率皆鹿麕冗資慎莫尤
汴渠非渠取膏脂

次韻臨淮感事

楚舸高帆未可開滿帆風暴作陰雷聖文亶亶傷
漂溺世路紛紛自往來浮磬猶聞傳激越沉妖不
見鎖淵回連陂鼉鼉鳴無數安得周官爲洒灰

次韻夜過新開湖憶二御共泛

出舟湖渺渺月白絕纖氛已見水如鑑莫生波上
雲獨征何慕侶冷酌不知醺露下清吟久同心本

愛君

荅宣城張主簿遺鴉山茶次其韻

昔觀唐人詩茶詠鴉山嘉鴉啣茶子生遂同山名
鴉重以初槍旗采之穿烟霞江南雖盛產處處無
此茶纖嫩如雀舌煎烹比露芽競收青翦焙不重
漉酒紗顧渚亦頗近蒙頂來以邀雙井鷹掇爪建
溪春剝葩日鑄弄香美天目猶稻麻吳人與越人
各各相鬪夸傳買費金帛愛貪無夷華甘苦不一
致精麤還有差至珍非貴多爲贈勿言此如何煩
縣僚忽遺及我家雪貯雙砂罌詩琢無玉瑕文字

搜怪奇難於抱長蛇明珠滿紙上刺畜不爲奢玩
久手生胝窺久眼生花嘗聞茗消肉應亦可破癥
飲啜氣覺清賞重歎復嗟歎既不足吟誦又豈
加我今實強爲君莫笑我耶

送寧國軍宰崔寺丞移臨安

六月畏嶺險乃陟川程迂遙看雲中鷹不亂江上
鳧魚網離飛鴻我邑望何殊鱗方懷其剖鳥反值
以剗爲言等王民豈限楚與吳是維見戀慕作詩
贈路隅

辯疑贈獻甫

一客逢吠狗無葦制狗狂一客叱狗吠一客言狗
良良狗豈妄吠好言已莫詳言乃仁之趨叱乃義
所當趨仁不顧義非是助狗猖吾今不疑仁仁義
嗟何妨

盜儒

其衣乃儒服其說乃墨夷天生物一本今尔二本
爲爾忍不葬親委以飽狐狸吾心則孟子不聽爾
矢辭

宣城宰郭仲文遺林檎

右軍好佳果墨帖求林檎君今忽持贈知有逸

少心密枝傳應遠朱頰映已深不愁炎暑劇幸
同玉漿斟

自和

陶公種五柳華氏戲五禽達性與養生共得古人
心佳果能御暑致之意何深河朔存故事助飲莫
憚斟

送王克憲奉職之彭澤

折柳贈子行况聞彭澤去將過五株下可與青青
助渭城人唱罷羌管愁吹處江上定多閑踈陰就
箕踞

寄潘歙州伯恭

我貧性愛酒有酒無錢沽新安走牙兵六月至我
廬手中持尺題肩上擔瓦壺高山度青天救此愁
腸枯開之聊傾樽渴肺如澆酥醉來欲學李白騎
鯨魚又思阮籍跨蹇驢上溪無健鱗下嶺無壯駒
憶君南望空長吁

再寄歙州潘伯恭

青山截天去古路蔽雲中不有行人至安知與郡
通高樓雖窈窕遠樹已溟濛今日勞君問衡門一
老翁

依韻和永叔澄心堂紙答劉原甫

退之昔負天下才掃掩衆說猶除埃張籍盧同闕
新怪最稱東野爲竒瑰當時辭人固不少漫費紙
扎磨松煤歐陽今與韓相似海水浩浩山鬼鬼石
君蘇君比盧籍以我擬郊嗟困摧公之此心實扶
助更後有力誰論哉禁林晚入接俊彥一出古紙
還相哀曼卿子美人不識昔嘗吟唱同樽罌因之
作詩荅原甫文字駛穩如刀裁怪其有紙不寄我
如此出語亦善談往年公贈兩大軸于今愛惜不
輒開是時有詩述本末值公再入居蘭臺崇文庫

書作總目未暇綴韻酬草萊前者京師競分買罄
竭舊府歸鄒枚自慙把筆粗成字安可遠與鍾王
陪文高墨妙公第一宜用此紙傳將來

依韻酬永叔示予銀杏

去年我何有鴨脚贈遠人人將比鷲毛貴多不貴
珍雖少未爲貴亦以知我貧至交不變舊佳果幸
及新窮坑我易滿分餉猶奉親計料失廣大瓊屑
且沉淪何用報珠玉千里來慇懃

依韻酬永叔再示

前歲守廩京城西有如勾踐巢會稽引盃嘗膽未

雪耻怒蛙起揖當岑蹄海天白日蔽光影霹靂一
過牧雲霓九臯澄明鶴翅濕欲暮刷羽聲嘶嘶客
來東方美鬚鬣夜光出袖行無迷授子照眼已希
世自顧臭穢猶萍蓬文章製作比善塑物象變怪
一以泥泥雖各用有巧拙巧之高絕非由梯又聞
東夷蹈水底騎頸直踞通天犀曼卿子美樓入室
似使二嫂治朕棲舜歸在床不可得此實素分非
能齊而今我獨向田里秋稼已熟烹黃雞自傾白
酒坐溪上誰念往日無梁祊隣邦或有寄嘉釀瓦
罌土缶盛玻瓈昨喜得書書滿紙官尊職大憐我
終當去問綿上叟自與野老月下犁

池州蕭相樓

復所建

樓中九華峯天削水蒼玉公主何參差來雲自聯
續我思唐蕭家八人居宰錄瑀嵩華復
俛傲真遺朱欄幾廢
興下視寒江曲吳侯來爲邦百事無窘束新之以
登臨風月詠玩足安得黃鵠翼一舉遺世俗

雜興

苦棟樹青鶉鴝啄鹽土鳴鳴老鴉啣茶子爭噪
落嶺隅不覺茶滿山漁利入江湖鹽由鶉鴝起茶
由老鴉趨誘以觸禁網二鳥誰與誅
東家月吐明西家犬爭吠玉兔在中天曾何競窺
穢姮娥雖夜行莫比淫奔廢啾啾籬下音胡不鈴
其喙

夢後寄歐陽永叔

不趨常叅久安眠向舊溪五更千里夢殘月一城
雞適往言猶是浮生理可齊山王今已貴肯聽竹
禽啼

送王著作赴西京壽安

翔向

去作西畿令當趨大尹庭閑尋前代跡淨掃古槐
廳未慣餐周粟還應憶楚萍但逢花木處知我昔
常經

答了素上人用其韻

予心每淡泊世路多變詐梟鳴與鵬怪何用思彈
射空山雖夜行猛虎終不怕功名未逢時壯士且
出跨七尺無競軀市人應亦訝有香知害身扶臍
見窮麝一朝珠出淵百金未酬價爾尋遠公去挈
鉢廬峯下我趨仁義急不解如陶謝

送通判黃國博入浙

西風半空鳴且豪
吳天點破吳鴻高
東溪車馬走送客
白露衰蘭輕若毛
客當西歸乃東去
爲何欲及八月十五夜
觀洪濤洗蕩生前色
邑邑不平氣付與
滄海之水隨滔滔
却來廣陵顧相見
拍手大笑傾新醪
一飲一石無一錢
莫管寒近脫弊袍
脫袍淮酒不惜醉
天意未必凍我曹

烏啄棗

樹頭陽烏飢啄棗
棗破紅遶地青蠅老
青蠅雨濕驚不飛
殘棗入泥人不掃
西風落盡烏亦歸
晉客齒

黃終懊惱

真上人因送毛令傷足復傷冷

陶令歸時遠公送石苔
秋雨步步遲遲凌霄花
在古松上笑向人人不知
聞道山中出入稀
偶來溪上笑談微
野雲不管田袍薄
寒逼瘦膚相伴歸

潘歙州怪予遂行與黃君同路黃先游浙
矣依韻酬寄

未識潘岳貌已知潘岳名
去年改藩屏暫此解佩纓
一見意已合談笑僕屢更
豈唯文學富况亦論

事精溪邊昔欲罷屑屑秋雨零于今又聞蟬重起
悲涼情作詩遠見招值我將西行譬彼矯翼鳥革
然顧侶鳴蒼山不可陟空入江上舫黃君雖云約
同泛明日自訪柳惲汀寒儒所向多不成或西或
東車馬驚高樓登望酸目晴欲觀弄濤仍膾鯨新
安太守空相迎舉手謝君江水清

潘歙州寄紙三百番石硯一枚

求叔新詩笑原父不將澄心紙寄予澄心紙出新
安郡臘月敲冰滑有餘潘侯不獨能致紙羅紋細
硯鑄龍尾墨花磨碧涵鼠鬚王方舞盤蛇與虺其

紙如彼硯如此窮儒有之應瞰鬼

八月七日始見白髭一莖

昔見白髭驚今見白髭喜人將拔去之我獨不然
耳拔之既更生留之何所耻白日儻日拔日拔詎
能已黑壯不爲貴白衰不爲鄙道德保於中任從
髭髮齒

送僧了素游廬山

平生愛廬山夢寢不可去江上饒賈船偶來看已
飫釋子言南游徘徊瞻瀑布月飛金鬪斗光展千
尺素嫦娥呼織女機杼勿復措必虞山鬼笑皎絜

無纖汗爾若見遠公贈之爲坐具

宛陵先生文集卷第三十五

宛陵先生文集目錄卷第三十六

送方進士遊廬山 讀日者傳荅俞生

賢師持栢種至 再和潘欽州

下昭亭舟中 和寧國山六題

寄吳正仲 湯秘校遺筆

艤舟昭亭 和公擇察推

謝晏太祝遺茶具 留題開元平雲閣

送黃生 別張景嵩

別鍾京 江口遇劉都紘

送劉紘曹 寄開元寺明師假山

寄李獻甫

行路難

題姑蘇豹隱堂

雨還

哭笑鳥

山行冒雨至村家

鴉啄蛆

夜坐

八月十五夜有懷

題吏隱堂

詠嚴子陵

與潯陽舍弟別

八月見杜鵑復開

記歲

種胡麻

詠達觀禪師

顏公遺茗

送達觀歸隱靜堂

冬至感懷

冬至得三友書

擬水西東峯亭九詠

和達觀還山見寄

九華陳生寄松筆

古柳

放鵲

聞西山虎

凍禽

登乾明碧鮮亭

隱靜遺枇杷

夢中

紅梅

寄文鑒大士

海棠

送餘干李少府

目錄終

宛陵先生文集卷第三十六

送方進士遊廬山

長風沙浪屋許大羅刹石齒水下排歷此二險過
湓浦始見瀑布懸蒼崖繫舟上岸入松徑三日踏
穿新蠟鞋路盤深谷出嶺望後山日照前山霧偶
逢風雨恐衣濕側倚石脇人相乖兩收不覺在高
處却見童僕提携借水聲不絕鳥聲好藥草香氣
侵人懷老僧避俗去足跣野客就澗開門闕樹崑
隱映見寺刹層層杳杳躋雲階塢田將穫烏雀橫
秋果正熟猴猿齧東林淡壑應似舊唯此足以待

爾儕子心洒落撒然往我方塵垢難磨揩

讀日者傳卷俞生

宋忠為大夫賈誼為博士同與休沐下訪卜長安
市吾不如二人讀書無舉跬借曰當乘肥乘肥非
我指唯思泉石間坐卧松風美

隱靜山懷賢師自持栢栽二十本種於會

慶堂

新作齋堂祠畫像又興高閣祕天蹤今朝還藉君
移栢昨日已因鵝種松近以羣鵝換
松植於路傍

九月六日登舟再和潘歙州紙硯

文房四寶出二郡邇來賞愛君與予予傳澄心古
紙橫君使製之精意餘自茲重詠南堂紙將今世
人知首尾又得水底碧玉腴溪匠畏持如抱虺拜
貺雙珍不可辭年衰只怕歛歛鬼

九月十一日下昭亭舟中

平生山野性坐卧愛流水適從昭亭來興自明河
起小舟浮輕槎身入星辰裏飲牛誰家即照鬢誰
家子隔岸心相望翻然洲鵲喜灘頭磷磷石欲贈
畏指毀留取自支機成都無卜士

和張簿寧國山門六題

山門

按碑本執轍作二軌雙時作雙壁第六句作田外峯巒回抱考陳甲尊當從碑本

青山中穴為大門下通軌轍高莫論飛雲出納不
計限雙峙平削無刀痕入門復見田園美田外峯
巒迴抱尊棲靈畜怪不可詰夔魑往往來守闔

紫雲巖

高崑日照雲常起吹作蘭花透紋綺橫為步障看
未收山雨一來風滿耳

夕陽巖

日脚射空金縷直下映壁間梭未織野老先知雨
又風明朝望此重雲黑

朝陽洞

洞門雖向扶桑開洞深不放陽鳥入古來道士今
莫逢石壁乳流苔正濕

漣漪洞

流泉泱泱出洞底自有細浪非風吹山花逐水到
山下漏泄人間春未知

碧雲洞

誰將萬古倚雲劍刺破蒼石天窻開下貯泓淵不
可極有時月漏清光來

將離宣城寄吳正仲

吳均詩語多奇揭苦倩鴛鴦謝明月昭亭川上此
禽閑為寄吳郎我西發西歸千里浮輕舟夜觀蟾
光逆水流水流東海月西海各去雖殊意常在月
偏皎皎隨人行水亦汙汙非浪改酒盆龍杓閑到
吟梅花重葉將誰采

湯珙秘校遺沉水管筆一枝

沉香細榦天通中束毫為呼諸葛翁久從海上厭
持握乞與阮籍書途窮物珍豈宜賤子有更後應
合歸玉公虛堂淨几塵不到硯傍置架珊瑚紅乃
知用遇自有處君今莫歎居蒿蓬

艤舟昭亭送都官暫歸錢唐

前枉大梁城詩賦嘉入幙茲對昭亭山將行還有
作別離此與彼終始情不薄我為解羈馬君乃高
飛鶴塵蹄未能息律翅懷棲泊尋巢望吳田一傍
華亭郭況多舟頂雛坐看翔寥廓

依韻公擇察推

君來何所聞君去何所見自古慕虛名往往輕既
面竊常恃賦稟平直如勁箭是以五十年長甘守
貧賤相逢嗟未幾遽遠劇飛電今雖行已晚多謝
勤相唁

晏成績太祝遺雙井茶五品茶具四枚近
詩六十篇因以為謝

始於歐陽永叔席乃識雙井絕品茶次逢江東許
子春又出鷹爪與露牙鷹爪斷之中有光碾成雪
色浮乳花晏公風流丞相族以此五色論等差遠
走犀兵至蓬巷青蕩出篋封題加紋柘冰斲作精
具靈味一啜驅昏邪神還氣主讀高詠六十五篇
金出沙已從鍛鍊出至寶終老不變傳幽遐自惟
平昔所得者何異瓦礫空盈車滌心洗腑強為答
愈苦愈拙徒興嗟

留題開元寺仙人平雲閣

背市面山色平目觀白雲漁舟溪上歌游客欄邊
閑俯簷翠栢瘦蔓籬秋實蕢偶來心意靜塵慮如
掃空

送黃生

我本東西南北人窮途不復淚露巾亦知車馬有
行色為見長沮與問津

別張景嵩

我雖識君晚君能知我心我心昭亭水見底無尺
尋照之不為隱測之不為深魚鰕既混混藻荇亦

侵侵終當至滄海浴日開黃金君當下灘去石浪
激寒音猶能洗君目病醫雲銷岑

別鍾京

我憐鍾氏子冒雨為求文暫以經茲邁與之書所
聞野鷗窺筆硯舟子采蒿芹況有新炊飯簞漿可
送君

江口遇劉紉曹赴鄂州寄張大卿

我同陶淵明遠憶顏光祿得錢留酒家醉卧江蕪
綠故人已貴身獨賤籬根枯死佳花菊孤鴻飛去
鸚鵡洲寄聲高樓謝黃鵠使君本是洛陽人嘗憐
已知清音通九霄定應悔說蘄州竹

送劉紉曹

溪邊前日君辭我江上今朝我送君自去蘆洲寄
消息故人猶在武昌軍

寄題開元寺明上人院假山

石是青蒼石山非杳藹山諸峯生鏡裏小嶺傍池
間雨不因雲出門疑為客閑何須費蠟屐暫到此
中閑

寄李獻甫

何言自我去眼前一似空城中豈無人過目猶飛
蟲又厭塵事多枳棘生曾中安知秋江水淨碧如
磨銅尚恨有世累不及垂釣翁望望當速來止琴
視孤鴻

行路難

途路無不通行貧足如縛輕裘誰家子百金負六
博蜀道不為難太行不為惡平地之一錢寸步隣
溝壑

題姑蘇豹隱堂

青山崔嵬藏古基文豹不見空斷碑華堂重構猶

隱霧地今易主還好竒欲邀明月一去飲常娥將
悔出海遲谿邊少年意氣在來往只借白鹿騎自
稱山人具肴酒酒酣請我留此辭謫仙墳近何可
問當日無詠亦所疑

雨還

雨濛濛兮欲暮路險絕兮深泥嗟予僕兮甚餒畏
子馬兮顛蹄閔已度兮心緩家將至兮涉溪喜膝
前兮童稚餉燈下兮女妻

哭笑鳥

日月轉入地星辰蔽重雲夜色晦若漆怪禽巢未

焚其音哭且笑哀樂詎能分方哭且笑時曾莫有
以羣哭為何所悲笑為何所聞了不預人事吉凶
誰復云

山行冒雨至村家

雨急芹泥滑禽鳴苦竹秋野香生草木雲潤上衣
裘入右纜通馬穿林忽隱牛山家多淺井下照碧
峯頭

八月九日晨興如廁有鴉啄蛆

飛鳥先日出誰知彼雌雄豈無腐鼠食來啄穢
廁蟲飽腹上高樹跋背噪西風吉凶非子聞臭惡在

爾躬物靈必自繫可以推始終

夜坐

夜久方慮寂空堂燈燭明落葉有暫響暗蟲無停
聲力學不為已甘貧且徇名聊為詠懷篇還想阮
步兵

八月十五夜有懷

天為水蒼玉月拖潭面冰萬里絕瑕玷百文已澄
凝山河了然在星斗光莫增借問九州內豈無陰
雲興紆懷去年秋是夜客廣陵太守歐陽公預邀
三四朋乃值連連雨共飲陳華燈既醉公有詠屬

和予未能強賦石屏物固慙無所稱今來宛溪上
聊以故歲徵晶明正若此霖霖且何曾美景信難
并康樂語足憑

題吏隱堂

新堂生虛明未悟追隱吏無乃隱非時唯應喧可
避移花莫傷根種竹不改翠床中置素琴亦見陶
潛意

詠嚴子陵

不顧萬乘主不屈千戶侯手澄百金魚身被一羊
裘借問此何耳心遠忘九州青山束寒灘濺浪鷲

素鷗以之為朋親安慕乘華輶老氏輕璧馬莊生
惡犧牛終為蘊石玉夙古輝巖陬

與潯陽舍弟別

昭亭潭上水下與九江通去客解輕軻落潮乘順
風迴頭迷遠樹沒背見飛鴻寂寞還蓬巷桓彝宅
近東

九月十八日山中見杜鵑花復開

山中泉壑暖幽木寒更華春鳥各噤口游子未還
家云誰未及還對此重興嗟何必因啼血顏色勝
曙霞

記歲

買臣四十八猶苦行負薪我免以樵給貧居年與均道上不謳歌妻亦無恙嗔三者固異彼異同雙朱輪

種胡麻

悲哀易衰老鬢忽見二毛苟生亦何樂慈母年且高勉力向藥物曲畦聊自薈胡麻養氣血種以督兒曹傍枝延扶踈脩筴繁橐韜霜前未堅好霜後可炮熬誠非騰雲術顧此實以勞

達觀禪師曇穎住隱靜蘭若或言自此獮

猴散走不來穎嘗哂曰吾知是山枇杷為多始至也未實故其去將實也必群集後果然穎惡乎俗之好異恐傳以為人惑欲予詠而播之

隱靜山中寺獮猴往往過窠師歸以去盧橘熟還多禪地寧求悌居人切莫訛未嘗嫌此物任挂古松柯

穎公遺碧霄峯茗

到山春已晚何更有新茶峯頂應多雨天寒始發牙採時林猶靜蒸處石泉嘉持作衣囊祕分來五

柳家

送達觀禪師歸隱靜寺古律二首

初逢洛陽陌再見南徐州
所歷幾何時倏去二十
秋今復振霜屨還山遠
莫留我詠阮公詩物靡必
沉浮誰云西海魚夜飛
東海頭世人嗟識昧豈是
滯林丘
栗林霜下熟歸摘禦窮冬
帶月涉溪水過山聞寺
鍾未嫌雲衲濕已喜野人
逢且莫似孟渡滄波無
去蹤

冬至感懷

銜泣想慈顏感物哀不平
自古九泉死靡隨新陽
生真命異草木彼將羨勾
萌人實嗣其世一衰復
一榮

冬至日得師厚宋次道中道書

水國欲為雪野冰將合
河人同一陽至淚向八行
多朋意今猶在年華悵似
過看看四十九應笑此
蹉跎

擬水西寺東峯亭九詠

垂澗藤

澗深連石壁石上生長藤
孤猿來自熟緣飲下復

登賴無樵人跡且免束薪蒸

嶺上雲

我來東峯下遠見西嶺頭白雲忽已合向此偶遲
留人誰問何有自可忘殷憂

林中翠

萬木總柔翠況復新晴時日色照欲動山氣歛還
遲望之如何攬舉袂隨風吹

棲煙鳥

班班遠林鳥極目波煙中各識時早暮不忘巢西
東推物得真意吾將效陶公

古壁苔

陰壁流暗泉古苔長自好不改春與秋何如路傍
草空山正幽藹淨綠無人掃

幽徑石

緣溪去欲遠磊砢忽礙行旁臨側身險下忽寒流
聲幽客慣來往同此猿鳥情

寒溪草

青青色堪染欲辨不知名根陰託乳魚水底抽新
萌康樂池上詠獨與春夢成

陰崖竹

背嶺斷崖下老竹生扶踈孤根石上引勁節松不
如莫言霜雪多終見綠有餘

臨軒桂

山楹無惡木但有綠桂叢幽芳尚未歇飛鳥銜殘
紅不見離騷人憔悴吟秋風

依韻和達觀禪師還山後見寄

雲歸在高嶺人見是無心矯矯將棲鳥遙遙傍故
林南方雖有暖臘月易成陰惟恐多風雪幽期未
可尋

九華隱士居陳生寄松管筆

春松抽瘦梗削束費長毫雞距初含潤龍鱗不自
韜嘗為大夫後欲寫伯夷高一獲山家贈令吾媿
汝曹

古柳

岸側古大柳誰種臨長江中自出蠹蝟百歲成枯
腔忽值漲流沒槎牙綴旌幢腹膚藏蛟鼉半夜雷
砰訇飛霆痕尚白如斬馬陵龐倏爾巨電至萬弩
聲裂缸又為狂風摧所殘惟朽椿卧榦越大鼎絕
續不可扛就藝以照漁駭鱗一何厖始知網罟細
未足禁突撞隆準以脫去城下徒焚降我從洲上

泊昏曉睨舩惚始終覩變毀欲賦挑殘缸吾交評
韓詩險韻古莫雙安得共詠此但嗟各他邦

放鵲 并序

烏鵲啄豆于槽園夫患之以機得鵲其群噪如救
為下上突掠甚急知不可脫聲蓋哀予閔之命釋
縛放去因為之辭

鵲為禽之靈智兮胡蹈機而不知為庸皂以困束
兮固性命之將危喜遠人之至止兮始屢驗以如
期向何預覺兮此何自昏豈專心以謀食兮昧目
前之禍根苟所履必慮患兮莫若去人遠以圖存

屑餘秣以致死兮誠咎爾而無耻維群鳴之苦傷
兮使吾心之測爾予測孔孟兮爾自解則艱皂聽
予言兮釋爾而還撫爾况爾兮爾無甚頑後誰恤
爾兮拓彈方彎

聞西山虎

猛虎畏白日孤客莫夜行彼以不暴衆此何獨忘
生飢必見人食不食且無名麋鹿能遠遁安得逢
怒獐由人不由常役役官有程

凍禽

高樹繞吾廬薄暮煙氣重將棲立傍巢已振窺

落翫有來同枿枝亦各不偃擁颼颼陰風寒夜雪
豈無恐

登乾明院碧鮮亭

餘喘不苟盡順信來飯僧東嶺有上方脩竹蔽觚
稜下有蒼石案旁挂孤蔓藤繫累向塵世更佳殊
未能

隱靜遺枇杷

五月枇杷實青味尚酸獼猴定撩亂欲待熟應
難

正月十日五更夢中

今年花似去年新去年人比今年老我勸厚地一
盃酒收拾白日莫苦早

紅梅

家住寒溪曲梅先雜煖春學粧如小女聚笑發丹
脣野杏堪同舍山櫻莫與隣休吹江上笛留伴庾
園人

寄文鑒大士

讀書夜寂冷無火捲卷遂成搖膝吟始憶高僧將
偈去安知古寺託雲深寒堂正睡遠鍾發野鳥亂
鳴殘月沉明日呼兒整籃輦欲煩重過小溪陰

海棠

江鶯入朱閣海棠繁錦條醉生燕玉頰瘦聚楚宮
腰曾不分香去尤宜着意描誰能共吹笛樹下想

前朝

嘗於末宣獻宅見圖書明皇於海棠
花下卧吹觱篥寧王吹笛黃幙綽拍

送餘干李少府

作尉古來清況於干越城舟中雨新足溪上水初
生蒼獺出還沒素鷗飛且鳴休將五色棒欲取洛
陽名

宛陵先生文集卷第三十六

宛陵先生文集目錄卷第三十七

與二弟過溪

晚坐北軒

與諸弟訪廣教

至廣教尋古石盆寺

題王介夫蒙亭

亢陽和欲行舟者

黃鶯

送懷賢上人

送瑞竹長老

鷺

守宮

夏園

孔子廟震

寄酬晏殿丞

荅李仲求寄茶

送闕令之潭

乾明院碧鮮亭

得餘干李尉書

南軒盆植蓮

朝天行

會勝院沃洲亭

江南雜感

和達觀山中見寄

送萬諤昌秀才

訪石子澗外兄林亭

和瑞式上人十詠

得晏相公書

訪施八評事

贈陳逸秀才

題陳宰戲綵亭

未慶松風亭

寄松林長老

題松林院

永州王守寄亭記

呈潘樂二君

過未慶院

廖宣城寄酒

翠竹亭

彩霓亭

留別樂和之

松風亭

雪中懷真上人

別施八評事

春日拜隴

昭亭祠喜雨

若訥上人彈琴

發昭亭

乘舟訪聰上人

過鴈洲

別達觀文鑑

和文鑒贈別

目錄終

宛陵先生文集卷第三十七

與二弟過溪至廣教蘭若

溪水今尚淺涉馬不及韉岸口出近郭野徑通平
田行行渡小橋泱泱響細泉萬木陰古殿一燈明
象筵長廊顏頽碑字體家法傳空堂裴相真白髯
垂過咽名跡兩不滅豈獨畫與鐫高僧鑿崖腹建
閣將雲連秘此龍鸞迹足使臣僕虔脩竹間長松
森衛若被堅是必神物護禹穴空歲年飯訖過山
後井傍携茗煎探幽偶轉谷忽視昭亭巔蔓草不
識名步側時得牽幽禽聲各異可辨唯杜鵑似鷺

俗客來聒聒兩耳邊弊廬隔城堞畏暮遽言還道
逢張羅歸鳥媒兼死懸遂同山梁雉令我復喟然
聊追一日事書以為短篇

晚坐北軒望昭亭山

少客兩京間熟游嵩與華歸來宛溪上馱往昭亭
下何以馱昭亭衰遲倦驅駕况復慙詠歌嘉辭前
有謝咀嚼在人口甘美如食蔗方同陶淵明苦語
近田舍節行固不變出處亦多怕常防惡少年豪
橫使出跨譬如故將軍尚被亭長罵不若守弊廬
讀書至中夜

與諸弟及李少府訪廣教文鑒師

山僧邀我輩置酒北陶潛紫蕨老堪食青梅酸不
嫌野蜂時入座品鳥或窺簷薄暮未能去前溪月
似鎌

至廣教因尋古石盆寺

古寺近田家山尋石盆差化蟲懸縊女啼鵲響繅
車僧坐樹間石馬行溪畔沙野香無處辨歸路傍

城斜

郡人不知古石盆寺在此山之傍舊基存焉山中

有井相去可二里豈圖經所傳裴休井歟近城有

右盆寺其側亦云裴相井者恐非是何則杜牧有石盆
山詩是寺因山名也從近城莫究其由呼盆為盆必風

俗訛也

觀王介夫蒙亭記因記題蒙亭

吾年將五十尚未暇讀易一聞蒙亭說乃見適所
適維時明進退豈不在泉石野服製升越山庖盛
雞躑床頭龍唇琴案上科斗籍風物稍佳時把酒
會三益況以兄爲郎仕也人豈迫重之愛之深自
匪逢時客

亢陽和欲行舟者

春秋書閔雨乃見先王制有意在黎民山川無不
祭今者望雲霓青天絕纖翳爲壇割舒鴈盤血陳
水汭于時頗精虔奠爵必親沈向夕有微陰掃然
還復霽吾聞先儒言陽驕不能閉此時繫穹昊已
力安所詣宣王雲漢詩曾不鑒上帝恨無稟盪舟
空自思躍蛟

黃鶯

內家初上翠微宮樹裏窺人在半空笑語漸高無
約束侍臣偷望向雲中
西鄰少年今出遊東家女兒未識羞門前烏臼葉
已暗日暮問誰牆上頭

送懷賢上人歸隱靜兼寄達觀禪師

適從山中來復向山中去爲報山中人莫厭山中

住近城塵土多亂爾煙霞趣野蜂銜漆汁尚欲爲
蒂固息此可以安其能忘我論

送瑞竹長老歸當塗因寄徐著作

謝傳青山路春來蔓草生樵蘇猶不入瓶錫莫能
行朝上野舩去宿逢溪雨鳴多應見康樂曾重遠
公名和師承嗣達觀
觀徐君頗稱之

鶯

桑間小婦好聲音映葉穿枝意已深盡日呼郎郎
不應蕭蕭風雨到前林

守宮

嘗聞漢武帝偶問東方朔臣擬作龍呼慙無頭上
角

夏園

夏園甘果熟日覺樹林稀休笑道傍李無人摘自
肥

孔子廟震宣城

霹靂下虛殿破楹非夢凶昔嘗瞻畫衮今實見升
龍隱隱雷聲散踈踈霧氣從予知仲尼廟不是蓄
乖慵

寄酬睦州晏殿丞

渚潭吐明月杳杳及吾廬流彩滿懷袖託情非鳥
魚朝因南澗雨暮入北畦鋤豈不藉餘潤況茲方
飢蔬

李仲求寄建溪洪井茶七品云愈少愈佳
未知嘗何如耳因條而荅之

忽有西山使始遺七品茶末品無水暈六品無沉
粗五品散雲脚四品浮粟花三品若瓊乳二品窄
所加絕品不可議甘香焉等差一日嘗一甌六腑
無昏邪夜枕不得寐月樹聞啼鴉憂來唯覺衰可
驗唯齒牙動搖有三四妨咀連左車髮亦足驚踈

踈踈點霜華乃思平生游但恨江路賒安得一見
之煮泉相與誇

送闕令之潭州寧鄉

秋風逆水急挂席飛鳥輕三江去雖遠一日行幾
程朝辭洞庭岸暮抵巴陵城長沙古建國地狹賦
薄征邑宰愛民者選薦豈非精旣曰處民上固當
知民情民居篁竹間山獠相雜并教道苟未至毫
髮心起爭太剛易斷折太柔難措撐貴在得中道
於焉無近名聞多不祥鳥似鴉何足驚遠方此爲
常慎勿心屏營賈誼度湘水爲文弔屈平因君寄

盃酒爲我酌賈生

軋明院碧鮮亭

壞衣削髮遠塵垢地祖龍孫生屋後不等渭川千
戶侯尺椽片瓦何嘗有方丈東頭一畝餘中軒四
面無牕牖青瓊作枝鈿爲葉丹鳳未食蒼鼠走細
藤織榻白晝眠寢濃鼻息如雷吼世間百事不歷
心門外寒流徹溪口

得餘干李尉書錄示唐人于越亭詩因以寄題
餘水之干越之鄙築基相對琵琶尾琵琶日日有
秋聲鴈過洞庭風入葦南斗戛湖波不起長刀刻

峯碧耳耳姱娥夜出在寒溪青銅瑩磨光幾里朝
因吳客幅蒲輕滿紙如蠶書可喜

南軒盆植重臺蓮移種池

彤雲赤霧生緒房朝霞變紫朱粉光白玉入泥不
滿盎羽蓋衰露明月瑤濁水一石亂鼃鼃鑿池五
丈如斗方萍根科斗得自在荷芰明年出水央

朝天行

大車高蓋徐方來天子雙日延英開犀靴踏玉陛
東陞從臣賜對論宮市諫官御史如指排捧土未
能障濁水大夫言斡天關迴黃門白望顏色死始

時暴奪何縱橫有貨晝日不敢行他時五方地當
酒誰道張郎臨井口

會勝院沃洲亭

前溪夾洲後溪闊風吹細浪龍鱗活孤亭一入野
氣深松上藤蘿籬上葛葛花葛蔓無斷時女蘿莫
翦連古枝當年吾叔讀書處夜夜濕螢來復去

江南雜感

樹頭巧婦棲樹下秋蟲織壞衣游子心千里嘗相
憶蕩子脚出門便作浮萍根憂來憑五兆拜樹賽
黃豚

依韻和達觀師山中見寄

獷豕在塗龍在澤豺狼食肉麝食栢蹄毛與角不
對齒啄觜兩足副以翮既能閑閑住深谷豈使于
于佩鳴玉水邊看虹山雨霽夜與明月歸獨宿門
前重嶺後群峯石樓朱殿藏林中銅絲緊轉輓轡
響絡緯秋老喙西風榮利淡薄無易此彼飲甘醲
茲飲水暫將分別向喉舌何異聲色亂眼耳孔孟
久歿言可師千古布散葉與枝今來閉戶自有趣
世上泫泫非我為

送萬諤昌秀才

志士不戀家安能坐吟咀儒冠難徒行馬骨瘦可
數後僕隔山陂前林遇風雨寒村夜宿時寂默誰
對語

訪石子澗外兄林亭

前日秋水漲昨日秋水落偶來尋隱居曾未乖宿
諾竹底除舊徑藤蔓繫新約馬留岸傍樹風掃林
下籜既能置魯酒又復餉楚餽誰知北南澗照影
似清洛平生愛幽曠斂迹誠非錯

和端式上人十詠

幽谷泉

幽谷有飛泉入溪知幾里跳珠濺木葉激雨霏崑
趾但無箕穎人曾不吝洗耳

古木陰

古木少直枝其下多曲影豈不愛高陰奈此性所
秉千重葉蒼翳誰願憇日永

寒溪石

翠聳聳寒溪上半隱寒松下水鳥立稜角淵魚游穴
罅尋常置庭檻瑣細不知價

孤汀蘋

瀟湘歸去人正值江南春始願逢拾羽今乃見採

蘋寄語柳使君莫恨日已曛

雲際鍾

煙昏青櫟道風急隔溪鍾
征馬未及息猛虎前有
蹤尋聲欲投宿僮僕畏所逢

垂崖鞭

崖竹出石壁根瘦懸青虵
磔髯露老節斫骨點寒
花少年莫翦去騎殺白臯駟

天外峯

天外一尺峯國中千仞岳
重雲不掩蔽萬里見頭
角世人看遠碧誰識產美璞

秋原菊

不爲潭上英不助籬邊醉
獨占蘭杞隣原頭自榮
悴陶令與太鑿逢人豈無意

漁舟火

蘆洲一點明知有漁人
泊江溟杳不分誰方在高
閣是時孤鴈去應認光中落

春溪水

春水冰欲開傍岸已微釋
魚寒未動鱗獸渡時有
跡篙師畏割舟敲拉碎圭璧

十月二十一日得許昌晏相公書

哀憂向二年朋戚誰與書敢意大丞相尺題傳義
廬從來鳳凰鳴不厭寒竹踈茂林多翔鳥要路盛
高車窮巷一如此江深無鯉魚

訪施八評事

施兄今七十近郭隱茅廬懶問齊民術喜看莊叟
書竹間鳴澗水原際見村墟識盡窮通理超然樂
有餘

贈陳無逸秀才

良犬不取鼠其人苦尤之近識固未辨善相义能
知在鹿忘守穴挫足乃馬而士有志功名局縮秉

書詩憔悴未得展磬折忽言卑舉酒一以贈願無
羞爾爲

題陳宰戲綵亭

仕宦固已美及親此其難況慕五綵戲而奉興居
安翁喜君亦喜翁食君亦食嗷嗷園中禽口哺心
違九邑大歲幸稔衆賴仁政寬還思彼赤子如恐
君不歡

永慶僧舍松風亭

誰按黃金徽滿指清風度但聽松上聲不知松間
趣野僧何所樂樂此數株樹寧邀俗客來草綠澗

西路

寄松林長老

大松五丈百歲餘小松五尺前時種俱有堅完不
朽心莫以今輕古爲重東溪一片寒玉光夜挂高
枝何所用

題松林院

靜邃無塵地青熒續焰燈木魚傳飯鼓山衲見歸
僧野色寒多霧溪痕夜閣冰吾非謝康樂獨往亦
何能

永州守王公慥寄九嵒亭記云此地疑是

柳子厚所說萬石亭也因爲二百言以答
願當留詠

天地磨今古賢愚爲埃塵草樹易變改山川無故
新眷言零陵守白髮駕朱輪間來問遺老俯跡哀
昔人昔人者誰歟元和前放臣下上窮幽荒憔悴
楚水濱試觀當此記圖寫未必真最苦來黃溪坐
石數游鱗有鳥大如鵠東向立不跋始買鈷鉤潭
鄠杜難計緡冉溪袁家洞亂石多磷磷深里與涕
白若盡無窮津石渠連崑泓菖蒲被其垠窮勝得
其詭衆美誰齊均西澗石爲底豈無芹與蘋澗崖

如堂席澗響如龍唇折竹掃陳葉羅榻同衆賓其
言粲星斗百歲猶比晨萬石乃淺近尚可資覆巾
而況前所說但恐煩鐫珉

潘樂二君對雪寄聲似欲予賦適方知之
走筆奉呈

南方今見雪北客定思家任凍不欺酒競春先著
花樓高休厭上山近未應遮誰問窮居日西窓墜
竹斜

過永慶院

荒涼舊蘭若古屋兩三重庭下已無栢澗邊唯有

松石堦生薜荔香座缺芙蓉化俗似禪衲破來縫
不縫

雪中廖宣城寄酒

輕舟泛泛昭亭灣春雪漫漫昭亭山寒沙曲渚杳
不辨素鷗翔鷺空中還宣城太守閑窮旅雙壺貯
醞兵吏頽任從六花壅船戶滿酌春色生衰顏醒
時但愛雲水好醉後等與天地閑世間取樂各有
分何必舞娥高髻鬟

翠竹亭

種竹幾千箇結亭三四椽遊人多寂靜啼鳥亦留

連酒有陶公愛林希阮氏賢我來歸路遠躍馬古城邊

彩霓亭

高出嶺頭樹俯窺城下溪半山飛急雨舉手弄晴霓
曠望已無極萬緣都與齊自嗟來獨晚征棹苦言西

留別樂和之

雪消潭水綠輕舸下灘時漸轉青山去還將故國辭
野林看欲動江燕欲逢遲君語隨州體余慙晚始知

松風亭

冉冉竹連澗森森松蔭崖始聞清吹度似欲綠琴諧
莫識主人意休論高士懷春城百花發薜荔上陰階

雪中懷廣教真上人

蒼山去不遠日日起寒雲堂上看飛雪水邊思練裙
銅餅生薄凍桂火馱殘薰欲往有餘興林幽路不分

下赤山嶺過渡至石子澗別施八評事

三歲守廬次兩迴來澗邊臨塘愛魚樂近竹見人

賢今我西歸日逢君小隱年重將車馬去驚起野
鷗眠

春日拜壠經田家

田家春作日日近丹杏破類場圃頭南嶺禽過北
嶺叫高田水入低田流桑牙將綻霧露裏蚕子未
浴箱篚收今我還朝固不遠紫宸已夢瞻珠旒

將行賽昭亭祠喜雨

未生潭上雲空望山中雨湛湛陳桂樽坎坎奏鼉
鼓蕭蕭靈風來蹲蹲祝郎舞莫言春作遲但念
寒灘阻何當發泉源綠水浸沙渚不與農者期自

將舟人語定作榜歌行暮投丹湖浦瞻祠草樹失
認嶺煙霞吐平吞東南吳遠帶西北楚川澤見坡
陀龍蛇蹙鱗脊人經興寤歎事往成前古考碑何
驗今塗馬立空廡余知骨相貧豈敢望冥許願乘
溪流深滂沛隨徹俎

若訥上人彈琴

祥哀已踰月遇子彈鳴琴安得不成聲子心異吾
心十日成笙歌尼父非好音先王禮有節不可過
於今莫作風入松懷壠情未任一聞流水曲歸思
在溪陰此焉吾所樂目極送歸禽

發昭亭

二月十三日

春泥深一尺車馬重重跡親舊各還城山川空向
夕今朝水平岸不畏舟礙磧始隨湍漲發已入青
蒼壁落日未逢人孤村望來客泱泱漫田流青青
被壟麥欲霽鳩亂鳴將耕杏先白我無農畝懃千
里事行役寄謝昭亭神果不吝深澤

乘小舟訪松山法聰上人

我從溪口來正值山前雨濕衣逢梵宮有僧善吳
語天寒蜜已空軒靜竹可數歸楫難久留汀鷗自
飛舞

過鴈洲六言

船從鴈洲北去鴈背春風亦歸但見平沙綠水
蘆荻筍方肥

別達觀文鑿二大士

雲衲山中來畫橈江上發何日到山中山花應未
歇

依韻和文鑿師贈別

來見寒沙鳥長隨上下波乃知游宦跡不似施松
蘿子語馬喻馬吾吟柯伐柯清江挂帆去奈憶故
山何

宛陵先生文集卷第三十七



